

TE MIHINI TUKU KORERO.

Kua whakaaturia ano e matou etahi o nga mahi a te mihini tuku korero, ahakoa kaore kau he waea. Ko te mea tino whakamiharo aru tenei o enei ra. Tenei ano etahi o nga raweke maha a tenei mihini, engari me whakaatu i te tuatahi te take i rere noa ai te korero i te takiwa; e kore e taetae te tino whakamarama, heoi ra ko te ahuatanga.

Te haerenga o te korero. Ki te pangaia te kohatu ki waenganui o te roto iti, ka pokarekare te wai; ko nga pokarekare ka taiawhio i te wahi i toremi ai te kohatu; i te tuatahi he ririki nga pokarekare, ka roa ka rarahi, nawai a ka pa ki te whenua i nga taha o te roto. Na he penei ano te haerenga o te korero i te takiwa. Kei roto i te mihini te hiko ara te *electricity*; kei roto ano tenei mea i nga mihini tarekaraawhe, tarewhone. Ko te roto kua korerotia i runga ake nei e rite ana ki te *takiwa noa iho*; ko te wai e rite ana ki te *ea*. Ka korero te tangata ki roto ki te mihini ka whakapokarekaretia te ea e te hiko i roto i te mihini; ka haere nga pokarekare o te ea, a te paanga atu ki te mihini e puritia ana e tetahi atu tangata, ka panapanana, ka rite tonu te panapanana ki te korero i tukua mai — na, ko te maunga o te korero te tuhihihi!

E 66 macro ki te moana. Te ingoa o te tangata nana i hanga tenei mihini ko Makoni (Marconi). I te reihitanga o te 'Shamrock' te iata o Ingarangi, me te 'Columbia' te iata o Amerika mo te kapu o te ao katoa, i mate ai a te 'Shamrock,' na Makoni i whakaatu ki nga tangata o nga nu-pepa i te tuawhenua, nga korero o te reihii, i te wa ano e rere ana nga kaupuke i te moana nui. Ko Makoni i runga tima. I tona hokinga mai i Amerika ki Ingarangi, i te whaawhai o te mano o te pahihii kia wawe te rongo i nga korero o te whaawhai ki Taranawaaara, no te mea kua maha rawa o ratou ra ki te moana i kore ai e rongo korero, e 66 maero te tawhiti o te tima ki te moana ka hopukia e te mihini a Makoni nga korero hou o te whaawhai i tukua mai e tetahi mihini i uta. I whakaaturia mai ano etahi atu korero. I whakaaturia atu e Makoni kei te pai katoa nga pahihii, i tukua atu hoki nga korero a nga pahihii ki o ratou hoa i uta; kotahi te tangata i korero atu ki ona hoa i uta kia takaina mai he hakari mo tona unga atu. Ka 45 maero te tatanga o te tima ki te tuawhenua ka taangia e Makoni ki te nupepa o te tima nga korero katoa i tukua mai i uta; e 48. 2d. te utu o te nu-pepa kotahi, ko

nga moni i hoatu e ia mo nga mahi aroha. Ka kino te haere a te pakeha! Ma wai koe e te pakeha e whaiwhai atu!

He kaupuke pakaru. Tenei ake ano etahi o nga hanga a tenei o nga atua o te pakeha. Kei te tomokanga atu ki te tuwheratanga o te Temie, te awa nui o Ingarangi, e tu ana a Ranaana. Kei taua tomokanga atu etahi tahuna, he akau kei te moana. Pakaru iho, pakaru iho te kaupuke ki enei tahuna i ia tau, i ia tau. Kua pungaia e te Kawanatanga he kaupuke-rariti ki runga i enei tahuna, hei whakatupato i nga kaupuke. I tetahi marangai nui, i te kaha rawa o te kuhu kaore i kitea te kaupuke-rariti, u ana tetahi kaupuke nui ki runga tahuna. I te kore kaore e kitea atu a uta, ka tukua mai te korero e te mihini i runga i te kaupuke-rariti i roto i te kuhu:—“He kaupuke nui kua pakaru, haere mai te poti whakaora.”

Rangana ana e uta te korero, maanu ana te poti hei riri ki te hau, ki te ngaru. Kaore i te kitea mai, i te mohiotia hoki e te kaupuke kei te haere atu te poti-whakaora i roto i te kuhu, na te kokiri tonutanga o te ihu o te poti i kite ai nga pahihii me nga heramana e... ko te ora tenei.

Tukua te karanga. E te tangata e nobo tonu nei i roto i te hara, kei te mohio ranei koe kei te toremi koe ki roto o te hohonutanga o te mate mutunga kore? Me he mea kei te mohio koe, hohoro te tuku atu i roto i te mihini o te ngakau he karanga mau ki te rangi, pera me te karanga a ia tangata i tukua ai:—“E te Atua tohungia ahau te tangata hara.” Ahakoa e karapotia ana a Ihowa e nga mano o te rangi, e karanga ana te ao katoa a ia, ka titaha mai ano tona taringa ki te karanga, ina pupu ake i roto o to ngakau. Ka pa tona ngakau i te aroha. Otira e te hoa kaore te ora i tawhiti rawa, kaore i te rangi i te hohonu ranei, engari kei to taha tonu. “Aua e mea i roto i tou ngakau, Ko wai hei kake ki te rangi: {ara ki te tiki atu i a te Karaiti ki raro;} ko wai ranei hei heke atu ki te hohonu: {ara ki te tiki atu i a te Karaiti i roto i te hunga mate.} E pehea ana oti? E tata ana ki a koe te kupu, kei tou mangai, kei tou ngakau: ko ia ia ko te kupu o te whakapono e kauwhau nei matou; ara ki te *whakaae* tou mangai ko Ihu te Ariki, a ka *whakapono* tou ngakau na te Atua ia i whakaara ake i te mate, e ora koe. Ma te ngakau hoki kia *whakapono* ka tika ai; ma te mangai kia *whakaae* ka ora ai.” (Roma x. 6—10.)

R. T. M. K.